

Bil. 19

Selasa

2 Julai 2019



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEDUA
MESYUARAT KEDUA**

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Pertanyaan Mengenai Status Pasar Awam Batu Pahat**
- YB. Dato' Dr. Noraini Ahmad (*Parit Sulong*) [Halaman 1]
- **Isu Pertukaran Wang Asing di Sempadan Padang Besar (Kedah-Thailand)**
- YB. Tuan Chan Ming Kai (*Alor Setar*) [Halaman 2]

**MALAYSIA
KAMAR KHAS
PARLIMEN KEEMPAT BELAS
PENGKAL KEDUA
MESYUARAT KEDUA**

Selasa, 2 Julai 2019

Mesyuarat dimulakan pada pukul 2.30 petang

DOA

*[Timbalan Yang di-Pertua (Tuan Nga Kor Ming)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Pertanyaan Mengenai Status Pasar Awam Batu Pahat

2.34 ptg.

Dato' Dr. Noraini Ahmad [Parit Sulong]: Terima kasih Tuan Yang di-Pertua. Saya merujuk kepada perkara di atas, saya ingin mengemukakan usul berkaitan Perkara Tadbir Kerajaan di bawah Peraturan Mesyuarat 17 kepada Yang Berhormat Menteri Perumahan dan Kerajaan Tempatan berkaitan status Pasar Awam Batu Pahat yang terletak di Jalan Pasar, Batu Pahat, Johor.

Untuk makluman Tuan Yang di-Pertua, projek pembinaan baru Pasar Awam Batu Pahat ini telah pun mendapat kelulusan oleh mantan Yang Amat Berhormat Perdana Menteri semasa lawatan kerja beliau pada tahun 2011 yang melibatkan kos kira-kira RM6 juta. Pembinaan baru ini adalah untuk menggantikan pasar awam sedia ada yang berusia lebih 50 tahun berikutan mengalami pelbagai masalah termasuk kebocoran pada bumbung dan paip air, parit tersumbat sehingga menimbulkan bau busuk, menyebabkan kesesakan lalu lintas dan masalah pendawaian elektrik.

Namun, sehingga kini masih tiada lagi sebarang perpindahan masuk oleh peniaga-peniaga dari pasar lama walaupun setelah pembinaan bangunan pasar awam yang baru telah siap pada awal 2018. Jadinya, saya ingin mendapatkan penjelasan daripada Yang Berhormat Menteri, apakah faktor yang menyebabkan peniaga-peniaga ini masih tidak berpindah masuk ke

dalam pasar yang baru ini? Seterusnya, saya juga ingin mendapatkan penjelasan daripada pihak kementerian, apakah masalah kelewatan perpindahan peniaga dapat diselesaikan segera dan bilakah tarikh sebenar pembinaan pasar awam ini siap sepenuhnya? Sekian, terima kasih.

2.36 ptg.

Timbalan Menteri Perumahan dan Kerajaan Tempatan [Dato' Raja Kamarul Bahrin Shah bin Raja Ahmad Baharuddin Shah]: Terima kasih Tuan Yang di-Pertua. *Assalamualaikum warahmatullahi wabarakatuh* dan salam sejahtera. Untuk makluman Yang Berhormat, projek pembinaan Pasar Awam Batu Pahat ini dilaksanakan oleh Majlis Perbandaran Batu Pahat (MPBP) melalui peruntukan Kementerian Perumahan dan Kerajaan Tempatan (KPKT) dengan kos sebanyak RM7.03 juta. Projek ini telah siap sepenuhnya pada 21 Februari 2019.

Proses pemindahan peniaga dari pasar awam sedia ada sepatutnya dijalankan selepas projek tersebut disiapkan. Walau bagaimanapun, pemindahan peniaga terpaksa ditangguhkan kerana terdapat isu penyambungan bekalan elektrik dari pencawang utama ke substesen pasar baharu. Tenaga Nasional Berhad (TNB) telah mengenal pasti bahawa terdapat keperluan untuk kerja pengorekan tanah bagi penyambungan bekalan elektrik ke pasar baharu tersebut. Pihak TNB juga kini sedang mendapatkan kelulusan dari Koridor Utiliti Johor (KUJ) selaku pengurus hal ehwal utiliti negeri Johor bagi tujuan kerja-kerja penyambungan bekalan elektrik ini.

Untuk makluman Yang Berhormat, segala masalah ini telah diatasi dan telah juga diselesaikan. Untuk makluman Yang Berhormat, kerja-kerja penyambungan bekalan elektrik ini dijangka selesai pada minggu ini iaitu minggu pertama Julai 2019 dan para peniaga dijangka boleh mula berpindah secara berperingkat ke pasar baharu pada minggu ketiga Julai 2019 iaitu sebelum akhir bulan ini, ya. Proses pengundian bagi penempatan peniaga-peniaga juga telah pun selesai dan pemindahan akan diuruskan oleh Majlis Perbandaran Batu Pahat dalam waktu yang terdekat yang dijangka dalam pertengahan bulan ini, *insya-Allah*.

Isu Pertukaran Wang Asing di Sempadan Padang Besar (Kedah-Thailand)

2.37 ptg.

Tuan Chan Ming Kai [Alor Setar]: Terima kasih. Tuan Yang di-Pertua, Yang Berhormat Menteri Kewangan, saya ingin menarik perhatian pihak kementerian ke atas masalah pertukaran wang asing Thai Baht di sempadan Padang Besar.

Padang Besar merupakan sempadan yang giat dikunjungi oleh warga Malaysia dan Thailand, malah di Padang Besar hanya mempunyai satu kedai pertukaran wang (*money-changer*) yang berlesen dan perniagaan warung dan gerai tempatan juga terima wang Thai Baht kerana terdapat ramai pelancong dari Thailand. Maka telah lama wujud budaya penukaran wang, sama ada dengan jual beli atau penukaran semata-mata tanpa dikenakan caj yang bukan bertujuan perniagaan perkhidmatan wang di bawah Akta Perniagaan Perkhidmatan Wang 2011 (Akta 731).

Terdapat operasi telah dijalankan oleh Bank Negara pada awal tahun 2019 dan terdapat kes yang diambil tindakan mahkamah dan juga kes yang hanya dikenakan amaran. Minta Menteri menyatakan berapa kes yang dikesan melalui operasi tersebut dan adakah operasi yang sama juga telah dijalankan ke atas gerai dan warung di Arked Niaga Padang Besar ataupun hanya ke atas lot kedai.

Apakah justifikasi dalam pemilihan *sampling* tersebut. Minta Menteri menjelaskan apakah prosedur susulan selepas kes dikesan. Mengapa ada kes yang dituduh di mahkamah tanpa amaran dan ada kes yang dikenakan amaran sahaja. Apakah justifikasi atas perbezaan tindakan yang diambil atas operasi yang sama. Sekian, terima kasih.

■1440

Timbalan Menteri Kewangan [Dato' Haji Amiruddin bin Hamzah]: Terima kasih Tuan Yang di-Pertua dan Yang Berhormat Alor Setar. Bagi menjawab soalan yang dibangkitkan, di bawah Akta Perniagaan Perkhidmatan Wang 2011 (APPW), pelaksanaan aktiviti perniagaan pengurusan wang perlu dilesenkan oleh Bank Negara Malaysia (BNM). Ini adalah bagi memastikan perlindungan pengguna serta operasi tersebut tidak disalahgunakan sebagai saluran untuk aktiviti-aktiviti haram, termasuk pengubahan wang haram dan pembiayaan keganasan. Perniagaan pengurusan wang tidak berlesen merupakan suatu kesalahan dan jika disabitkan kesalahan boleh didenda sehingga RM5 juta atau dipenjarakan sehingga 10 tahun atau kedua-duanya.

Buat masa ini, terdapat dua pengurup wang berlesen menjalankan perniagaan perkhidmatan pengurusan wang di Padang Besar. Peserta industri yang berupaya memenuhi kriteria 'layak dan sesuai', dengan izin, *fit and proper person* dan keperluan urus tadbir, operasi serta kewangan minimum seperti dikehendaki di bawah APPW boleh membuat permohonan lesen atau menjadi ejen kepada pemegang lesen sedia ada untuk menjalankan perniagaan pengurusan wang. Sebagai ejen, peserta industri khususnya peniaga kecil dapat memanfaatkan sistem operasi, latihan dan kawalan yang disediakan oleh pemegang lesen prinsipal dalam menjalankan perniagaan pengurusan wang di samping mematuhi keperluan undang-undang yang berkenaan.

Memandangkan pelaksanaan aktiviti perniagaan pengurupan wang tanpa lesen adalah suatu kesalahan yang serius di bawah APPW dan juga suatu kesalahan predikat di bawah AMLA, usaha membanteras kegiatan pengurupan wang haram terus diambil oleh Bank Negara Malaysia. Aktiviti pemantauan dan pengawasan (*surveillance*) dipertingkatkan bagi mengenal pasti dan mengumpul bukti berkenaan pihak yang disyaki menjalankan perniagaan pengurupan wang tanpa lesen. Ini termasuk individu atau syarikat yang berada di mana-mana tempat dan menjalankan apa jua bentuk perniagaan supaya tindakan sewajarnya boleh diambil ke atas mereka.

BNM akan menjalankan pemantauan dan pengawasan ke atas individu atau syarikat yang disyaki menjalankan perniagaan perkhidmatan wang tanpa lesen berdasarkan sumber maklumat yang boleh dipercayai. Selaras dengan ini, BNM telah menjalankan operasi pada bulan Mac 2019 di Padang Besar, Perlis bagi mengambil tindakan terhadap lima premis yang disyaki menjalankan perniagaan pengurupan wang tanpa lesen berdasarkan maklumat dan hasil penemuan daripada aktiviti pemantauan dan pengawasan Bank Negara Malaysia.

Tindakan penguatkuasaan Bank Negara Malaysia, sama ada untuk mengeluarkan surat amaran, tindakan pendakwaan atau apa-apa tindakan yang lain adalah berdasarkan penilaian bukti sama ada ia memenuhi inti pati kesalahan di bawah APPW serta beberapa faktor relevan yang lain. Penilaian tersebut dijalankan oleh satu jawatankuasa dalaman Bank Negara Malaysia melibatkan pelbagai jabatan yang berkaitan.

Jika mana-mana Ahli Parlimen mempunyai maklumat mengenai aktiviti perniagaan pengurupan wang tanpa lesen ini, bolehlah mengemukakan maklumat tersebut terus kepada pihak Bank Negara Malaysia di *bnmtelelink@bnm.gov.my* ataupun nombor telefon 1-300-88-5465 supaya tindakan penguatkuasaan yang sewajarnya dapat diambil. Sekian, terima kasih.

Timbalan Yang di-Pertua [Tuan Nga Kor Ming]: Terima kasih Yang Berhormat Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Rabu, 3 Julai 2019.

[Kamar Khas ditangguhkan pada pukul 2.43 petang]